



國朝耆獻類徵初編卷二百六十七目錄

將帥七

沙爾虎達

子巴海

敦拜

石廷柱

子孫

吳世俊

孫雲龍

舒里渾

伊爾德

孫巴琿岱

薩弼圖

西喇巴雅爾

劉用楚

濟席哈

蘇魯邁

子鄂洛順

索渾

珠瑪喇

都爾瑪

卷之二  
 一



國朝耆獻類徵初編卷二百六十七

通奉大夫前署江西巡撫江西布政使司布政使湘陰李桓  
將帥七

沙爾虎達

子巴海

沙爾虎達姓瓜爾佳氏其先蘇完人世居虎爾哈 太祖高皇帝  
時從其父桂勒赫來歸任佐領隸滿洲鑲藍旗天命初從征瓦爾  
喀部有功授騎都尉世職天聰元年明人於錦州大凌河築城屯  
田 太宗文皇帝自將擊之既至大凌河明人棄城走大軍遂圍  
錦州沙爾虎達時任前鋒參領累戰皆捷三年大軍征明入紅山  
口拔遵化州抵北京沙爾虎達敗其郭外兵論功授三等輕車都

尉世職自是數奉 命同前鋒參領勞薩等率遊騎入明邊往來  
錦州松山杏山間俘擊明謀卒凡擒哨長一獲邊卒十八牲畜器  
械甚夥大凌河之捷也明總兵祖大壽降請歸錦州爲內應旣而  
背其言八年 上於行營遣大臣略地至錦州且遣書大壽恐不  
能達 召沙爾虎達 親授方略令襲取守烽墩卒付以 敕書  
如無所獲卽懸書十三站山坡沙爾虎達輕騎往未遇敵懸書而  
歸九年與步軍統領巴奇蘭等征黑龍江以功加一雲騎尉時貝  
勒多鐸率師征明錦州遇祖大壽部將劉應選等於大凌河曲  
上以多鐸所將兵少令沙爾虎達及各旗大臣扎福尼等往濟其  
軍會多鐸已擊敗明兵遂班師是年冬赴錦州偵軍事還獻俘獲



命卽以分資將士崇德元年從征朝鮮率兵敗敵於南漢山城二年列議政大臣上以參領丹岱阿爾津等往土默特貿易慮明兵於中途截擊遣沙爾虎達率將校往歸化城護之三年與前鋒統領吳拜率兵八十人至紅山口遇明兵斬其裨將二擊走羅文峪騎兵五百奪其纛獲馬四十又殲密雲步兵百餘四年上統軍征明沙爾虎達率前鋒兵趨義州復至錦州捕伐薪爲炭者取其牲畜猝遇敵卒敗之尋率土默特部卒二百人入甯遠北界與參領蘇爾德鄂碩布丹先設伏以數騎誘敵敵堅壁不出乃擒其樵採者以歸五年敘功晉二等輕車都尉六年三月隨睿親王多爾袞圍錦州以離城遠駐下部議罪應革職籍家產之半上

特宥之令罰鍰八月擢前鋒統領 上以累歲用師錦州未克遣  
將更番圍之明人分道赴援屯師松山 上親征部分諸將擊敵  
賜沙爾虎達馬使率兵營於高橋東界 誠之曰爾素日行不逮  
言今日之役當思自勉復 諭曰如敵兵敗可以杏山西臺橫截  
大路躡擊之母使入城及戰明兵遁沙爾虎達達 命弗追擊縱  
潰卒二百餘入城 上繫而問之曰汝何辭稽首對曰殺臣祇一  
死耳宥臣當效命疆場乃 赦之罷前鋒統領及議政俾任參領  
立功自贖七年虎爾哈部煽亂沙爾虎達受 詔與葉赫珠瑪喇  
討平之招降喀爾喀木等十七人戶千餘獲馬騾牲畜無算凱旋  
賜宴及布帛有差 世祖章皇帝順治元年沙爾虎達征庫爾喀

及黑龍江皆有功復隨大軍追擊流賊李自成於潼關明年隨貝勒博洛攻取江甯進師杭州所在力戰三年論功晉一等輕車都尉四年授副都統駐守東昌時克東賊渠丁維岳張堯中攻陷州郡撫臣張儒秀告急沙爾虎達馳軍進剿大破賊眾陣斬渠魁東郡以平敘功加一雲騎尉五年江西總兵金聲桓據南昌叛沙爾虎達隨大軍征討有功遷護軍統領後爲議政大臣六年河間賊竊發奉命率兵剿撫賊黨解散明年改任鑲藍旗滿洲副都統晉爵三等男累遇恩詔晉一等男兼一雲騎尉九年正月上以吏部於兩次恩詔加秩過濫削去沙爾虎達一雲騎尉七月奉詔統率官兵駐防甯古塔十年擢都統仍畱鎮守賜冠服



鞍馬十五年七月鄂羅斯犯塞沙爾虎達擊走之斬獲甚眾十六年卒年六十有一喪還 命大臣祭奠 贈太子太保諡襄壯立碑如例長子巴海襲爵別有傳

右 國史館本傳

巴海

巴海滿洲鑲藍旗人姓瓜爾佳氏沙爾虎達長子也初任佐領順治十四年授祕書院侍讀學士十六年襲父一等男爵 世祖章皇帝諭吏部曰甯古塔係邊疆要地沙爾虎達駐防年久甚得人今已病故其子巴海素著勤慎堪代其父授爲甯古塔總管十七年鄂羅斯犯邊境巴海同副都統尼哈里等率兵至黑龍江松

花江交會處偵賊在飛牙喀西境卽疾趨使大部界分布舟師潛  
伏江隈賊船踵至合擊之賊敗卻棄船登岸竄走巴海督兵追剿  
斬六十餘級溺水死者甚眾獲其船及槍礮軍器因招降飛牙喀  
百二十餘戶敘功加一雲騎尉十八年追論禦擊鄂羅斯時有五  
船兵失利巴海不以實奏削一等男及雲騎尉 聖祖仁皇帝康  
熙元年改總管爲將軍仍以巴海任之十年 上詣盛京 召巴

海問甯古塔及瓦爾喀虎爾哈人民風俗 諭曰朕向聞爾賢能

今益知爾矣飛牙喀赫哲雖服然其性暴戾當廣布教化多方誘  
迪鄂羅斯雖云投誠當加意防禦訓練士馬整備器械毋墮狡計  
爾膺邊方重任尙知黽勉以報朕知遇之恩初邊境有墨爾哲氏



者累世輸貢至是巴海招之其長扎努喀布克托等願率眾內移  
巴海請安輯於甯古塔附近地設佐領四十以扎努喀布克托及  
諸族屬任之分轄其眾號爲新滿洲十三年冬巴海率諸佐領入  
覲 頒賚有差 特賜巴海黑狐貂裘朝衣各一襲十七年 諭  
獎巴海暨副都統安珠瑚實心任事撫輯新滿洲戶口咸令得所  
各 予一等輕車都尉兼一雲騎尉世職二十一年巴海疏言巡  
緝採獲官兵宜分別所獲多寡定獎賞之例 上諭部曰盜採者  
緝獲視所獲多寡議敘甚爲允當其非採獲而子身採捕他物者  
毋得妄拘並詳議著爲令時 上幸吉林回鑾 諭巴海以吉林  
兵丁勞苦宜加憐憫 命除捕牲取魚諸徭役俾勤耕種二十二



年以奏報田禾歉收不實部議罷任革世職 上曰巴海遷移新  
滿洲不可謂無功降世職爲三等輕車都尉罷將軍任二十三年  
授鑲藍旗蒙古都統尋列議政大臣三十五年卒 賜祭葬如例  
子四格襲職

右 國史館本傳



敦拜

敦拜滿洲正黃旗人姓富察氏其先世居沙濟父木科理當太  
祖高皇帝時來歸有朱舍理部長尤額楞梗化不服命同鄂佛  
洛總管達賴往征之有功賜號蘇赫巴圖魯管佐領事尋卒子  
三人敦拜其長也初任佐領天命十一年從大兵征明甯遠先驅  
偵敵擊敗城中出戰兵師旋遇敵二十人與步戰盡殲之敵復以  
騎追射我師敦拜還擊卻敵殿後以歸天聰八年太宗文皇帝  
嘉其克副任使授騎都尉世職崇德五年擢護軍統領隨鄭親王  
濟爾哈朗圍明錦州敵出城誘戰敦拜突入其隊斬三人餘眾俱  
遁敵騎自杏山一再來犯並戰卻之六年復圍錦州明總督洪承



疇自松山遣兵犯我兩紅旗營敦拜先後率所部禦敵尋復來犯  
我外藩蒙古營敦拜趨援敗敵斬首二百餘級獲其雲梯十四七  
年敘功加一雲騎尉八年同護軍統領阿濟格尼堪率兵駐防錦  
州 世祖章皇帝順治元年隨大軍入山海關擊敗流賊李自成  
兵追至望都二年敘功晉世職二等輕車都尉先是自成敗遁還  
西安明福王朱由崧自立於江南 上敕豫親王多鐸征江南取  
道河南先除自成賊黨敦拜率護軍以隨師至陝州賊將劉方亮  
領兵千餘來犯敦拜同護軍統領圖賴阿濟格尼堪等奮擊敗之  
賊復夜襲我營敦拜率兵連敗賊眾遂破潼關進定西安自成由  
商州遁走湖廣敦拜同護軍統領阿爾津等追斬三百餘人豫親

王移師下江南敦拜復從破揚州趨江甯朱由崧聞大軍至遁走蕪湖將登舟渡江敦拜追及之與阿爾津圖賴等扼據江口截其去路明將黃得功迎戰我兵奮擊盡奪其舟得功中流矢死由崧爲其總兵田雄等執以獻三年敘功晉世職一等是年隨端重親王博洛由浙江進征福建同副都統珠瑪喇擊敗僞總兵黃某等拒戰兵五年隨征南大將軍譚泰討江西叛鎮金聲桓賊黨踞九江府敦拜先驅直抵城下敗賊眾聲桓與其黨王得仁糾步騎七萬自南昌迎戰敦拜合兵奮擊敗之復招撫臨江一府四縣六年命統兵勦畿南土賊陣斬賊渠李玉三陳金玉邢少川吳臨瑞席快等獻縣雄縣任邱寶坻諸邑土賊悉平七年五月敘平定西安

福建江西功晉爵三等男尋隨睿親王多爾袞獵於中後所以同  
都統噶達渾等私行射生降一等輕車都尉明年 上親政復爵  
如故九年遇 恩詔晉二等男十一年僞晉王李定國自廣西犯  
廣東 上遣珠瑪喇爲靖南將軍以敦拜佐之統兵往征時定國  
擁眾新會據山峪立砦平南王尙可喜先以兵防禦未及戰敦拜  
同珠瑪喇至遂合兵進剿破賊巢斬獲甚眾復追至橫州江岸定  
國遠竄獲賊眾十六馬二百餘所陷郡邑悉復凱旋敘功晉爵二  
等子得 旨從優再議晉一等子會有疾乞休 上念其勤勞年  
久加太子太保以原官致仕十四年起爲盛京總兵十七年正月  
卒 賜祭葬如典禮謚襄壯無子以從孫瑚錫布爲嗣襲爵